

Parlamentario mr. Xiomara Ruiz-Maduro di Fraccion di MEP

Nos ta acumulando informacion pa drenta un debate sano pa e proyecto di Urirama

ORANJESTAD — “Nos ta preparando pa e debate cu mester tuma luga ariba e proyecto di Parke di Molina di biento na Urirama. Parlamento di Aruba mester duna e ultimo palabra si e proyecto aki ta bay bira posibel si of no. E reunion aki ainda no a wordo yama pero nos ta haciendo nos investigacion pa asina nos por tin tur informacion necesario pa nos por tuma un decision balansa ariba esaki,” palabranan di Parlamentario mr. Xiomara Ruiz-Maduro di Fraccion di MEP.

PREGUNTANAN HACI NA WEB

Segun e Parlamentario, dia 3 di october nan a manda puntra WEB algun pregunta tocante e funcionamiento di e otro parke di molina, cu ta e parke di molina na Vader Piet.

Mirando cu WEB no a contesta nan preguntanan concretamente, pero WEB a pretende cu nan mester saca e informacion for di 2 presentacion cu nan a yega di duna na e comision di utilidad na Parlamento y e presentacion cu nan a duna na Green Conference, nan a dicidi di haci preguntanan oficial e ora na Minister de Meza.

PREGUNTANAN HACI

NA MINISTER DE MEZA
Vader Piet tin 3 molina di biento cu e capacidad di 10 mega watt y segun Ruiz-Maduro, lo bo spera un produccion di 30 mega watt pero WEB ta bisa cu nan lo calcula cu e lo produci 18 mega watt.

Website di WEB ta bisa cu na 2010 y 2011 ta solamente 12 mega watt a wordo produci. Segun Ruiz-Maduro, nan a puntra e siguiente preguntanan:

1. E motibo pakico e produccion di molinanan di Vader Piet ta menos cu nan capacidad y kico ta loke a wordo calcula.
2. Kico a pasa cu e diferencia.
3. Cuanto mega watt nos ta consumi aki na Aruba pa dia y kico e porcentahe ta cu ta wordo cubri cu e coriente di Vader Piet.
4. Cuanto bari di fuel nos ta usa menos awor akinan door di e reemplazo di coriente di Vader Piet.
5. Un indicacion di cuanto placa WEB ta spaar na fuel oil, mirando cu awor akinan nan ta uzando e coriente di Vader Piet.
6. Nos ta consciente cu energia limpi no ta energia barata y si WEB awor aki no tin un “besparing,” anto e ora



Parlamentario mr. Xiomara Ruiz-Maduro preparando pa debate ariba proyecto di Parke di Molina di biento na Urirama

nos ta puntra si Minister por splica nos cuanto mas WEB ta pagando pa asina por haya uza e energia limpi cu Vader Piet ta produci.

7. Pa por tuma coriente for di Vader Piet, WEB y pafo di WEB, mester por a haci algun inversion, anto nos tabata kier a sa con grandi e inversion aki tabata ta.

8. Duna nos e rapport di MER, e Social Environmental

Impact Assessment cu nan a haci e tempo ey na Vader Piet y especificamente nos ta puntra si den e rapport aki tambe, nan a tene na cuenta e tempo ey e riesgo cu por tin pa salud pa esunnan cu ta biba den vecindario di Vader Piet.

E Parlamentario a conclui bisando, “Ta importante pa nos por haya e informacion lo mas lihe posibel pa nos por

hiba un debate sano y funda pa asina nos mira si Vader Piet a produci bon, menos bon y kico su gastonan tabata ta pa local ta WEB pa asina nos por premira si un di dos parke di molina ta necesario y si WEB por carga e gastonan, paso si esaki no ta e caso, probablemente despues e gastonan aki lo pone cu prijs di awa y coriente lo bolbe subi pa pueblo di Aruba.” □

Segun Andin Bikker di PDR

Gobierno ta actuando contra ley den caso di Urirama

ORANJESTAD – Gobierno ta actuando contra ley pa loke ta e asunto di Urirama y nan mester duna un splicacion. Esey ta pensamiento di lider di fraccion di partido Democracia Real, mr. Andin Bikker. E ta sigui splica cu parlamento ta wardando riba un reunion publico pa tuma luga pa trata e caso. E rapport cu fraccion di AVP tabata wardando riba dje, esta e rapport di MER a keda cla y no ta mira pakico e reunion aki no por tuma luga.

NINGUN CONTESTA

Dia 16 di mei fraccion di Partido Democracia Real a manda preguntanan concreto riba kico ta pasando na Urirama y te ainda no a ricibi ningun contesta. E parlamentario ta sigui bisa cu no por ta asina cu e Landsverordering Ruimtelijke Ontwikkelingsplan ta bisa cu no mag di traha nada. Tin un proceso, si kier cambia e ROW, mester bay den barionan, scucha e habitantenan, proceso delinea den articulo 5 te cu 8 di ordenanza. Gobierno no a haci esaki tampoco, segun e parlamentario, pero si Gobierno ta bezig, pa ta specifico Minister di Husticia, cu un proceso pa trata un aplicacion di Hinder Verordering.

CONTRA SU MESUN LEYNAN

Bikker ta cuestiona con por ta posibel cu un gobierno ta actua contra su mesun leynan. Gobierno ta hopi silencioso riba e tema, aunke cu a cuestiona esaki den luna di Mei. E desaroyado ta papia rond haci

manera cos ta cla caba y ta duna hende hopi di pensa y tambe hopi pregunta ta surgi. E hecho ta cu awor e rapport a yega parlamento, cual segun Bikker, no a causa ningun impresion den su fraccion. Mester tin un reunion publico mas pronto posibel pa asina pueblo di Aruba sa unda tur partido ta para.

PARLAMENTO TEY PA CONTROLA

Mester distingui kico e rol di e parlamentarianan ta den parlamento. Nan t'ey pa controla gobierno y no e desaroyado, segun Bikker. Preguntan cu a wordo haci no a wordo contesta y tambe bin den un reunion publico cu no a wordo yama te awor aki pa haci pregunta verbal y a base di contestanan por bin cu un mocion. Si gobierno no contesta preguntanan ya pa lunanan largo y reunion no ta wordo yama, parlamentarianan ta wordo imposibilita den nan trabao. Ta lamenta e manera di procede di parti di gobierno cu ta basicamente casi obliga e grupo di ciudadano preocupa aki pa gasta placa pa bay corte. Gobierno mester a dunanan atencion na e situacion y tambe contesta pregunta di parlamentarianan, cuestiona cu por ehempel trabaonan a cuminsa caba.

CONTRADICTORIO

Ki mishi cu na un sitio delinea cu ta berde (groen gebied) no mag di construi nada y toch ta haya un gobierno ta trata un Hindervergunnings aanvraag, a base di e hinderverordering (ordenanza di

molester), pa evalua si ta laga construi eyan of no, e parlamentario ta cuestiona. Gobierno no ta bon bezig y ta actuando contra ley. Ironico ta cu ciudadanonan cu tin tereno cu a wordo delinea berde, si ta wordo stroba door di gobierno pa traha cualquier estructura, pasobra segun gobierno e landsverordering ta prohibi pa traha algo riba e tereno ey. E ora si Gobierno ta bisa “ta ley pa un, ley pa tur.”

PRESION RIBA GOBIERNO

E impresion cu e desaroyado di e proyecto di Urirama ta uno di un “done deal”, segun e parlamentario. Ta pa e motibo ey lo bay insisti pa yama un reunion pa asina contesta e preguntanan cu a wordo haci por escrito na Gobierno. E presion aki tambe lo bay bin via prensa pa asina gobierno contesta e preguntanan haci por escrito. Esaki tambe ta conta pa Presidente di Parlamento, caminda lo bay pone presion pa yama un reunion mas pronto posibel.

NO MESTER SIGUI WANTA

E reunion pa trata e asunto di Urirama mester a tuma luga dia 5 di september ultimo, segun Andin Bikker. E rapport di MER a yega y no ta mira pakico mester sigui aplasa e reunion. E Parlamentario ta sigui bisa cu tin cu trata e tema aki den e reunion y haci uzo di e derechonan constitucional como parlamentario pa bin cu mocionnan y eyan ta mira tambe unda tur partido ta para. Pa loke ta partido Democracia Real, nan sa unda nan ta para. □